



IPSAS-Soka Gakkai Pupuk Anti Keganasan Melalui Pameran



Urusetia pameran sedang menerangkan kepada pelajar mengenai kepentingan keamanan

SERDANG, 20 Julai – Institut Pengajian Sains Sosial (IPSAS) Universiti Putra Malaysia (UPM) dengan kerjasama Soka Gakkai Malaysia (SGM) telah menganjurkan pameran 'From A Culture of Violence to A Culture of Peace: Transforming the Human Spirit' di Perpustakaan Sultan Abdul Samad (PSAS), UPM.

Prof. Dr. Tai Shzee Yew berkata, pameran tersebut dibuat untuk mempromosikan kesan masalah keganasan akibat peperangan dan kaedah bagaimana manusia dapat menyumbang untuk mengekalkan keamanan generasi akan datang.

"Melalui pameran ini pengunjung dapat meningkatkan kefahaman mereka untuk membuat perubahan bagi mengekalkan keamanan sejagat .

"Usaha IPSAS dengan kerjasama SGM telah memberi peringatan positif mengenai tanggungjawab bersama untuk menjamin keselamatan manusia dengan cara membuang sikap tidak mengambil kisah mengenai silent violence yang kian berleluasa," katanya ketika merasmikan pameran tersebut dengan disaksikan oleh Ketua Pengarah SGM, Choo Kong Fei.

Sementara itu, Pengarah IPSAS Prof. Dr. Md Salleh berkata, "Senario dunia masa kini mempamerkan sebahagian besar manusia bergelut untuk hidup di tengah-tengah cengkaman keganasan dan kemiskinan.

Katanya, dunia semakin dipenuhi dengan konflik peperangan yang berlarutan malah keamanan yang diharapkan tidak menjadi kenyataan.



"Pengunjung berpeluang untuk menyaksikan poster-poster kesan keganasan peperangan serta menyaksikan tayangan bertajuk 'Pengalaman Hiroshima dan Nagasaki : Wanita Bersuara Demi Keamanan,' katanya.

Kong Fei dalam ucapannya berkata, kali terakhir SGM mengadakan pameran bersama UPM adalah pada Ogos 2006 melalui pameran 'Seeds of Change: The Earth Charter and Human Potential.'

"Pameran ini diwujudkan untuk memperingati ulang tahun ke-50 Deklarasi Menentang Senjata Nuklear oleh Josei Toda yang merupakan presiden kedua Soka Gakkai sejak tahun 1957.

Toda dalam pendiriannya mengutuk senjata nuklear yang mengancam manusia dan kehidupan alam sejagat.

Beliau berkata, Soka Gakkai International (SGI) telah mengadakan kerjasama dengan lebih dari 190 buah negara bagi mempromosikan idea pendidikan kemanusiaan dan pertukaran budaya di seluruh dunia.

"SGM dan cawangan kami telah mengadakan pameran seumpama ini di seluruh negara dan telah disaksikan lebih 180, 000 pengunjung."

Disediakan oleh Seksyen Media dan Publisiti UPM